

金光明經文句卷第五

釋十

隋天台智者大師說

門人灌頂錄

釋四天王品

四天王者上升之元首下界之初天居半須

彌東黃金埵王名提頭賴吒此翻持國領乾

闍婆富單那南瑠璃埵王名毗留勒叉此翻

增長領鳩槃荼薜荔多西白銀埵王名毗留

博叉此翻雜語領毗舍闍毒龍北水精埵王

名毗沙門此翻多聞領夜叉羅刹此四王聞

經歡喜各領五百眷屬發誓護經從此標章

故稱四天王品觀心釋者東集南苦西道北

滅四諦理是四天觀四諦智為四王護四諦

境名護國護心數是護眾生世者他也為他

說心數名護他眾生八部者苦諦下有利鈍

見思法華指此為鬼神乃至滅諦下亦有見

思是為八部也若不照四諦理見思二惑侵

害心王毀損境界心王亡境國敗心數人民

逆散境智俱為鬼神所惱能觀苦集控作見

思則國安民寧能為他說四諦是護他國土

遮彼見思使得安樂是為觀心護世四天王

也此下十三品是流通段佛慈季末使邪惡

不翳於正真經王不墜於來代有緣之者得

正聞正聽故曰流通凡為七意四天王至散

脂明天王發誓勸獎人王弘宣此經正論善

集明人王弘經天王祐助亦是示往日弘經

方軌鬼神品明聽經功德天神地祇若河若

海菩提薩埵咸守衛之授記品證聽經功德

之不虛除病流水引昔聽經之功德證今護

持之非謬捨身品引昔行經不惜軀命誠勸

釋十

二

師弟勿吝法財讚佛品明諸菩薩稱揚佛法能宣所宣利益深重云云天王發誓又爲五四王以天力擁護請者大辯品以辯充益說者功德天品誓以資財潤請者說者地神品誓以地味膏腴味請處說處散脂品誓以威武摧外敵攘內難安於請說聽等也又天王護其國大辯護其師功德護其衆地神護其地散脂攘其災令經法大行也云云四天王品者有六番問答卽爲六段第一白佛述有護國之能第二白佛述其護國之事第三白佛示其軌模第四白佛要其法利第五白佛雙述興衰第六白佛說偈頌德初番爲二一白佛二佛述成白佛又二一經家敘二正白佛敘敬如文正白佛文爲二一歎經二述能護諸天信法有力是故歎經欲得經弘述其能護

歎經爲三從是金光明下歎經體從莊嚴菩薩下歎經宗從此經能照下歎經用正說乃多歎三則略攝於廣也法性之理佛所護念文詮此理故言經王既言經王知是歎體約體修行能令菩薩具二莊嚴成於極果既言莊嚴知是歎宗世天淨天義天皆宗仰極地施三業供養恭敬是身歡喜是意讚歎是口又下從地獄上至菩薩無明未盡通有熱惱此經能除如月清涼知是歎用云云從世尊是金光明下是第二述能護國文爲二一內以法護國二外以策護國補十法護國又四一護國之由二以法護國三以天黨護國四以天眼護國護國由者由聞此經獲於四益身益光明力益勇猛心益增進德益尊嚴理獲二益謂法身慧命皆得增長由國弘經致斯法潤

寧得不護述所以者此義正與觀心相應以四諦智護四諦境即是修行正法以四諦智導諸心數使諸心數不行故名行般若波羅蜜即是能說正法內有如此護國所以名護世王正治國土爾時黨護國者此亦與觀心相應心王帥心數黨降伏見思利鈍諸使如諸天王共眷屬遮諸惡鬼如轉輪王與七寶千子有所至處四方歸德四王共五百所臨之地何惡不除邪用天眼護國者以報得天眼徹視無幽不燭防萌杜漸何惡不除邪二從若此國土有諸衰耗下是智策護國令內外因緣和合文爲三一若王國多災種種艱難謂兵饑疾者我以智策勸法師往或威神勸往或現形勸往或降夢勸往法師若往廣宣此經如日出朝陽雲霧自歇此勸外緣也

次王心無智照災承闍入若有明慧變怪不生師既秉法來儀王須專心聽受王若勤聽天亦勤護所以加於可加護於可護一人有慶賴及萬方王身與國安隱無患此內因也若外雖有弘法人王內心不殷重則不和合不能禳災也二者王無惠施則寡於福祿如不勤田倉廚少穀勸王傾財供給四眾四眾得安福資於王舉國眷屬一切無患此內外因緣和合能致豐年流行云三者王身無先王之德行臣民不從口無先王之法言鄰國不誅今勸王三業供養恭敬是身業尊重是意業讚歎是口業夫高以下爲基辯以訥爲師屈尊敬卑功亦大矣以天威力使鄰國遙崇羽檄稱讚歌詠羨慕三業顯顯上之化下如風之靡草鄰國既然國人牛馬草葉無不

低迴內向此則能讚所讚因緣和合頌聲溢於鄰國云云經文分明尋之可見次佛述成文爲二初合述歎經二述其能護國四王初歎經說既合理佛述而成之成其上體宗用三歎故言佛合述善哉善哉其上總歎一教佛述成其徧讚百千諸佛諸佛從是法生故舉多讚成於一也從於諸佛所下述成其能護國又爲二初述以法護國二述以智眼護國法護國有四佛皆述成上明護國之由由聞經得益佛述今益良由先種發心畢竟二不別如是二心前心難是故敬禮初發心此舉前以成後述後以顯前從說於正法下述其以法護世上云能說能行所以名爲護世佛亦述成能說能行得名護世云云從汝等今日下超述其天眼護國小不次第於義無失上

第十

五

云以淨天眼過於人眼佛述長夜利益夫天眼夜照不假日光故言長夜也從汝等四王及諸眷屬下追述其天黨護國上直言護國佛今加讚是護三世諸佛正法也從汝等四王及餘天衆下述其智眼和合護國上云請法師入境攘惡此功歸已能却修羅之陣汝勸王聽經供給四衆佛述其內智外福實是消伏諸苦能致安樂如文云云第二番白佛述護國之事文爲二一白佛二佛述成白佛又二一是經流布之處其王自能頂受又供給四衆者我及眷屬誓當隱形令其顯益二者惡鄰興兵侵斥善國我當隱形起諸怖懼種種難起今其軍兵顯然退散尚不擾邊況能壞中云云次佛述成文以爲二從爾時佛讚下至無鬪訟之事是述成初意其上隱形護國

欲使經弘佛述隱形是護三寶我是佛寶修習菩提是法寶諸王無闕訟是僧寶述其護一而能成三也從四王當知此閻浮提下是述成後意上以天威懾之天力退之似若憎惡愛善佛勸慈心平等向之爲惡者自懷爲善者自豫非薄惡而厚善成其懷退之意也又勸諸國各守本業住境自樂勿起貪企諸王和則民無天法興盛則熏諸天佛告帝釋闢諍因緣人天損減善能慈和天下非止供養於我則是供養三世如來非止安於一王徧安諸王非止安於一國徧安一切故以慈和述成第二意也_{云云}第三白佛示人王軌模文爲二一出其願欲二示其軌模願欲有六一欲安己身二欲安妻子三欲安宮殿四欲王領殊勝五欲攝諸福德六欲國無憂苦六

願如文從世尊如是人王下是第二示其軌模雖不次第六數足上欲安身今示莫放逸制心則身安也上欲安宮殿今示嚴法堂楹蓋映於上香華麗於下三寶受用則柏梁無災上欲王領殊勝今示洗沐香塗敷恭去慢一身敬於此八絃休於彼上欲攝取福聚今示正念聽經正念聽經能致無量功德天神竭其力覆地神竭其力載鬼神竭其力護臣民竭其力愛上欲安妻子今示和顏與語勸其興福內外修善感益事多上欲得國無優苦今示應自喜慶自勵忘疲倍作利益一人既悅則四海謐然此之謂也次佛述成文爲二先述成六方法次述成六願欲四王約六事又所說少止在現世佛約一事而所益多超無量世倍述成之從佛告四王下祇弘經

聽經即是述成安身方法上直示心不放逸
今加示羽儀出宮迎候步步值那由他佛方
法既倍體亦彌安從復得超越爾許劫難者
述成安國方法上止一世無憂苦今則超爾
許生死之難從復於來世封受輪王者述成
安妻子方法輪王有玉女千子悉無怨對爾
許劫中妻子常安也從亦得如是現世自在
之力者述成上安於王領方法也從常得最
勝七寶宮殿者述成上安於宮殿方法也從
在在生處訖具足無量福聚述成其上攝福
方法也從汝等四王下述成其六種願欲從
四王下至不退轉述成上願安身從已為得
值至畢三惡道苦述成上安國從我今已種
輪王釋梵之因述成上願安妻子從已種無
邊善根下述成上欲攝福聚從後宮宮宅無

諸凶衰述成上願安宮殿從國土無有他方
怨刺述成上王領第一從汝等四王下更總
結成六法六願皆令具足者若能屈已迎候
至心聽法即是六願六法又迴利施天亦即
能令六願六法成就滿足也第四白佛要其
人王施善此由第三段末文為二一白佛二
佛述成白佛又二一人王運心二天宮相現
人王心存至典是故香作金光迴施必得是
故天宮相現香至天宮龍宮鬼神等宮總至
三法界爾觀心解者以智慧火然實相香起
戒定慧煙實相是真法故言金光戒慧與理
冥故徹照無礙也云云次佛述成文為二先述
香光非但至天宮等三法界徧至百億諸宮
又至恒沙佛上總而言之徧至十法界也從
諸佛世尊聞是香氣下述成人王運善奉施

諸天為諸佛所讚先讚因成次讚果滿如文
第五白佛雙舉興衰文為二一白佛二佛述
成白佛又為三初從白佛至諸惡災患悉令
消滅是第一舉興勸從若有人王心生捨離
至善神遠離生如是等無量惡事是第二舉
衰勸從世尊人王欲自護及王國土是第三
正勸舉興勸為四一人王弘經則四天隱形
聽受三非但四王聽受釋梵八部皆集聽受
三以是人王為善法知識四既得法利護國
彌勤皆如文次舉衰勸亦四一王不弘經天
失甘露則威勢減少二釋梵舊神並皆遠捨
三惡鬼亂行災毒競起四展轉結成災災何
故起惡鬼亂行鬼何故行天神捨離天何故
捨不聞法食何故無法食王不弘經如文三
正勸為六一欲得現利故必定聽二天欣法

食故必定聽三出過三論故定聽三論者四
韋陀論說梵事毗伽羅論說十善事僧佉衛
世師勒沙婆論說學通事云云四始終得益成
就菩提故必定聽五教主勝於釋梵故必定
聽六諸法之本故必定聽皆如文次佛述成
文為二初番述成舉興勸不弘則衰無可述
成又解云前番則兩述成而與安樂是述成
舉興勸滅其衰患是述成舉衰勸從若有人
能於人天中作大佛事者述成正勸云第六
白佛文為三一說偈歎二佛以偈答三歡喜
發誓偈歎有八行半文為三初一行歎三身
次五行半歎身相次二行結歎夫三身有通
別依文是別空是法身日是報身月是應身
通意者空是法身日是報身水日是應身空
是法身月是報身水月是應身空是法身日

中空是報身水中空是應身月亦如是依結
歎文空是法身月是報身水月是應身空是
法身日是報身燄是應身化法是法身化主
是報身化事是應身雖復別說義則通融故
文云無有障礙即通意也歎身相文為五初
一行歎上兩相謂目與齒次一行半歎智斷
兩德謂智三昧次兩行歎下兩相謂平與網
次兩句絕言歎謂不可思議次兩句結歎夫
相好不獨在應身報法亦通莊嚴父母生身
者應相好也莊嚴尊特身者報相好也莊嚴
法門者法身相好也此中歎智斷即法身相
好也文云無有障礙者非獨歎一身相也偈
初標佛月今先結佛月為三身次結三身通
融故言無有障礙次結佛日故言如燄次結
佛化身即是四身義故言如化皆具三身四

身則是無障礙也結竟即禮禮於佛月亦是
禮佛日佛化也品初歎經歎體宗用品後讚
佛辭異義同佛真法身即是體佛月清淨即
是宗應現水月即是用天王天辯其妙若此
也問空譬法身月譬報身空為作月不作月
空若作月月非空作空不作月月那依空答
空不作月亦不作非月月非月必依於空法
不作報亦不作非報報非報必依於法又問
法不作報非報報非報必依於法者亦應月
不作影亦不作非影影非影必依於月者月
亦是法身耶答智與法冥法是法界智亦如
法界云云又並影不作動與不動動不動必依
於水水亦是法界耶答動不動譬機一切諸
法中悉有安樂性譬法界亦是無妨又淨度
三昧云眾生亦度佛若無機感佛不出世亦

不能得成三菩提出世菩提皆由眾生機爲法界此義成也佛答二十四行半偈天王所以讚佛者佛能說法故也法王所以讚法者法能成佛故也般若云我初成道觀誰可敬可讚無過於法法能成立一切凡聖故佛讚法以答天王文爲三初一行歎經體答其法身次一行歎經宗答其報身次二十二行半歎經用答其應身悉如文三四王歡喜發誓如文

釋大辯品

辯有四種小辯無量辯雙辯大辯無漏法名小辯恒沙法名無量辯備二種名雙辯雙非雙照名大辯此天住智慧莊嚴法門自住大辯以自在力爲悅眾生故隨說一辯若二若三若四故名大辯爲宜眾生故若授一辯若

十一

十一

二若三若四宜而立之故名大辯爲對眾生故或對一辯若二若三若四對而治之故名大辯爲悟眾生故若悟一辯若二若三若四一悟一切悟而開發之故名大辯對佛發願以大辯加於說者故稱大辯品文爲三一從白佛下以大辯力加益法師二從若有衆生於百千下以感應力加於化道三從復令無量下以行力加於聽者初加法師以樂說辯才莊嚴次第是辭辯大智是義辯總持是法辯若有衆生下加化道流布不絕加其能化之道無人無所化無道無能化因緣和合化道不絕也從復令無量下是加聽衆兩益聞經至不退轉是加因益必定得菩提是加果益文言雖略誓願甚深爲益大矣

釋功德天品

此天住福德莊嚴法門攝一切法而以功德爲首故言功德天又能與說者所須無所乏少故名功德天又令說者晝夜思惟是經深義故名功德天又令聽者速成菩提具此衆義故名功德天品此是天王護經第三意福資請說及以聽者文爲六一從白佛下發誓四事資給法師二從我已於過去下明福德之由三從若有人能稱下勸示行法文中略有示廣示云云四從我於爾時如一念頃下誓臨影響五從若能以已所作迴施我下要求同行六從應當禮下別示歸敬悉如文

釋堅牢地神品

上諸天或住善權方便道爲衆生法父此天住善實智度道爲衆生法母一義也譬如陰陽覆載卉木智度養育出生衆善二義也餘

十一

十二

度各有所主未亡未泯實智照了無相無名三義也餘度有等有上智度無等無上是究竟度四義也智度法門常無改變義曰堅牢常也能荷樂也能生淨也名之爲地德力自在我也稱之爲神從此等法門故名堅牢地神品此品是天王護法第四意翻涌地味資益請說聽等地也文爲三一從白佛下誓涌地味利益行者二從爾時佛告下如來述成三從爾時地神下發誓弘經初涌地味文爲三從初白佛下明已身利益凡約八事展轉增長由聞法故法味增長法味增長故氣力增長氣力增長故翻地味增長地味增長故諸物增長諸物增長故衆生五果增長五果增長故修行增長修行增長故供養增長供養增長故弘通增長悉如文從何以故世尊

下明眷屬利益是經力增長凡約五事展轉
增長以經力故我眷屬增長眷屬增長故地
味增長地味增長故諸物增長諸物增長故
衆生快樂增長快樂增長故依報皆具足具
足亦名增長從世尊是諸衆生下名報恩增
長凡約六事展轉增長以知我恩故專聽增
長專聽增長故功德增長功德增長故教他
增長教他增長故地味增長地味增長故受
樂增長受樂增長故信施增長悉如文二佛
述成文爲二一約聞經展轉增長從人世至
天世從天世至出世日夜即受不可思議快
樂即出世樂也地神所說止是今世增長如
來述成文雖略意極長遠二述成供養增長
從人世至天世從天世至出世長遠之義準
前可知云云二發誓護經文爲三一誓護說法

者二誓護化道不絕三誓護聽法者如文

釋散脂鬼神品

具存梵音應言散脂修摩此翻爲密密有四

義謂名密行密智密理密云云蓋北方天王大

將餘三方各有東方名樂欲南方名檀帝西

方名善現各有五百眷屬管領二十八部孔

雀王經云一方有四部六方則二十四部四

維各一部合爲二十八部又說者云一方有

五部謂地水火風空四方有二十部足四王

所領八部是爲二十八部巡遊世間賞善罰

惡皆爲散脂所管聞經歡喜發誓護於說者

聽者從能護人受名故言散脂云云文爲四一

從白佛下發誓護持二從何因緣下述有能

護之德三從散脂大將下誓以智力充益說

者四歸敬本師初段有經家敘正發誓悉如

確十

十四

文述德又爲三初標次述後結標如文述又爲三初五句述智次五句述境次五句述正三番稱世尊知是三種意也神既名密述名顯德應談密義智若淺深階級次第不名爲密即一智一切智一切智一智非一非一切而一而一切者斯是智密若得此意五句一句一句五句非一非五而一而五唯數唯密爾若境可以智知可以口說者境則非密不可智知不可識識不可以名名不可以言說是名不可思議密境也而約五數論密者例前可知也若對邪道明正道待邊說中此正非正此中非中皆非是密即邪而正即邊而中邪正中邊無二無別者乃名爲密思益云若以心分別一切法者一切法邪若不以心分別一切法者一切法正即其義也我行正

道若境若智從此得名唯然世尊自當證知云云又此三番一往是身口意密前五句言知知即意密次五句言現見現見屬眼屬身即身密後五句明正解由正解故言正分別分別即口密所以言不彰露者是密義也如此述名密義已顯賞味無已更復略說世尊我知一切法下作三觀義解之知一切法一切緣法兩句同是因緣所生法境何者能生爲因是初句所生爲緣是第二句能所合故諸法得起中論云因緣所生法即此義也了禪十一切法者了達虛無也中論云因緣所生法我說即是空是爲從假入空觀也知法分齊者知空非空用道種智分別假名凡聖之法無有差別中論云亦名爲假名是爲從空入假觀也如法安住一切法如性者以二觀爲

方便得入中道第一義諦中論云亦名中道義即是中道第一義諦觀也含受一切法者即是中道正觀能雙照二諦故言含受若三觀一異縱橫並別者則不名密觀即一而三即三而一名爲密欲知智在說說即口密也世尊我現見下五句作三諦三解脫義釋之現見不可思議智光者光是實智如日月光常明不息此實智照不可思議真諦境成圓淨解脫也不可思議智炬智行智聚者皆是權智如人執炬屈曲照物乍興乍廢隨順機緣或此或彼行是因義聚是果義從因以向果果興而因廢皆是權智照不可思議俗諦成方便解脫也不可思議智境者是法如如智此智與法如如冥故言不可思議智境此智照不可思議中道第一義諦成性淨解脫

也若三諦三解脫一異縱橫並別者非不可思議也以不一異並別故故名不可思議不可思議故名密也世尊我於諸法下五句作三身釋之正解正觀正解能顯體顯名正觀正觀是報身也得正分別正解於緣者分別機緣不待時不過時普應一切即是應身也正能覺了者無覺無不覺名爲覺非了非不了名爲了究竟清淨之覺了即法身也若此三身縱橫一異者不名爲正非一非異不前不後故名爲正正即密也約正明法身即是金義約觀明般若即是光義約不思議解脫即是明義三德是微密之藏金光明是微密之教從密教生密解安住密理行於密行以密利他故我名密唯然世尊自當證知復次此十五句互相釋成若正解正觀十五句

皆正解正觀也若不可思議智光十五句皆不可思議智光也若我知者十五句皆知也云又作五種佛性釋者正性緣性了性三名不異又一家取果性境界性為五又一家取果性果性為五若作果果性即沒境界性為緣因性所攝若開境界性即沒果果性為果性所攝雖開合不同終是五數今以五知對五佛性我知一切法者知一切法中悉有安樂性安樂性者即正因佛性也一切緣法者無量功德低頭舉手之善緣因佛性也了一切法者即是般若空慧了因佛性也知法分齊者即世間出世間因果不濫境界因佛性也如法安住如性者即是果性究竟安住如中也含受一切法者還是果性能雙照含受也若作果果性者取知法分齊為果性克

補十

十七

果智照分明為分齊也安住如性含受為果果性云若然者下兩種五句亦應對五佛性師雖不釋義例應爾準須釋出其意消文令會爾世尊以是義故下是結文也從世尊散脂大將下是第三發誓以智辯克益說者文為二先益能化次益所化益能化為三莊嚴言辭下益其口業眾味精氣下益其身業心進勇銳下益其意業從以是之故下益其所化此亦為三以是之故廣說是經此是未種者令種也若有眾生下是已種令熟也無量眾生下是已熟者令脫悉如文此消文大好從南無寶華下是第四歸敬文也佛說一切眾經初皆歸敬而譯人略之諸論初亦先歸敬此文是說竟歸依三寶在文可尋也

金光明經文句卷第五